

সাম্যবাদী

সাম্যবাদী

গাহি সাম্যের গান—

যেখানে আসিয়া এক হয়ে গেছে সব বাধা-ব্যবধান,
যেখানে মিশেছে হিন্দু-বৌদ্ধ-মুসলিম-ক্রিস্চান।

গাহি সাম্যের গান !

কে তুমি ? —পার্সি, জৈন ? ইহুদি ? সাঁওতাল, ভিল, গারো ?
কনফুসিয়াস ? চার্বাক-চেলা ? বলে যাও, বলো আরো !

বন্ধু, যা খুশি হও,

পেটে-পিঠে, কাঁধে-মগজে যা-খুশি পুঁথি ও কেতাব বও,
কোরান-পুরাণ-বেদ-বেদান্ত-বাইবেল-ত্রিপিটক—
জেন্দাবেস্তা-গ্রন্থসাহেব পড়ে যাও যত শখ,—
কিন্তু কেন এ পণ্ডশ্রম, মগজে হানিছ শূল ?
দোকানে কেন এ দর-কমাকষি ? —পথে ফোটে তাজা ফুল !
তোমাতে রয়েছে সকল কেতাব সকল কালের জ্ঞান,
সকল শাস্ত্র খুঁজে পাবে সখা খুলে দেখো নিজ প্রাণ !
তোমাতে রয়েছে সকল ধর্ম, সকল যুগাবতার,
তোমার হৃদয় বিশ্ব-দেউল সকলের দেবতার।
কেন খুঁজে ফেরো দেবতা-ঠাকুর মৃত-পুঁথি-কঙ্কালে ?
হাসিছেন তিনি অমৃত-হিয়ার নিভৃত অন্তরালে !

বন্ধু, বলিনি ঝুট,

এইখানে এসে লুটাইয়া পড়ে সকল রাজমুকুট।
এই হৃদয়ই সে নীলাচল, কাশী, মথুরা, কদাচন,
বুদ্ধ-গয়া এ, জেরুজালেম এ, মদিনা, কাবা-ভবন,
মসজিদ এই, মন্দির এই, গির্জা এই হৃদয়,
এইখানে বসে ঈসা মুসা পেল সত্যের পরিচয়।

এই রণ-ভূমে বাঁশির কিশোর গাহিলেন মহা-গীতা,
এই মাঠে হলো মেঘের রাখাল নব্বিরা খোদার মিতা।

এই হৃদয়ের ধ্যান-গুহা মাঝে বসিয়া শাক্যমুনি
 ত্যাজিল রাজ্য মানবের মহা-বেদনার ডাক শুনি।
 এই কন্দরে আরব-দুলাল শুনিতেন আহ্বান,
 এইখানে বসি গাহিলেন তিনি কোরানের সাম-গান !
 মিথ্যা শুনিনি ভাই,
 এই হৃদয়ের চেয়ে বড় কোনো মন্দির-কাবা নাই।

ঈশ্বর

কে তুমি খুঁজিছ জগদীশে ভাই আকাশ-পাতাল জুড়ে ?
 কে তুমি ফিরিছ বনে-জঙ্গলে, কে তুমি পাহাড়-চূড়ে ?
 হায় ঋষি-দরবেশ,
 বৃকের মানিকে বৃকে ধরে তুমি খোঁজো তারে দেশ-দেশ !
 সৃষ্টি-রয়েছে তোমা পানে চেয়ে তুমি আছো চোখ বুঁজে,
 স্রষ্টারে খোঁজো—আপনারে তুমি আপনি ফিরিছ খুঁজে !
 ইচ্ছা-অন্ধ ! আঁখি খোলো, দেখো দর্পণে নিজ-কায়া,
 দেখিবে, তোমারি সব অবয়বে পড়েছে তাঁহার ছায়া।
 শিহরি উঠো না, শাস্ত্রবিদে করে নাকো বীর, ভয়,—
 তাহারা খোদার খোদ প্রাইভেট সেক্রেটারি তো নয় !
 সকলের মাঝে প্রকাশ তাঁহার, সকলের মাঝে তিনি !
 আমাদের দেখিয়া আমার অদেখা জন্মদাতারে চিনি !
 রত্ন লইয়া বেচা-কেনা করে বণিক সিন্ধু-কূলে—
 রত্নাকরের খবর তা বলে পুছো না ওদেরে ভুলে।
 উহারা রত্ন-বনে,
 রত্ন চিনিয়া মনে করে ওরা রত্নাকরেও চেনে !
 ডুবে নাই তারা অতল গভীর রত্ন-সিন্ধুতলে,
 শাস্ত্র না খেঁটে ডুব দাও সখা, সত্য-সিন্ধু-জলে।

মানুষ

গাহি সাম্যের গান—

মানুষের চেয়ে বড় কিছু নাই, নহে কিছু মহীয়ান !
নাই দেশ-কাল-পাত্রের ভেদ, অভেদ ধর্ম জাতি,
সব দেশে, সব কালে, ঘরে ঘরে তিনি মানুষের জ্ঞাতি ।—

‘পূজারী, দুয়ার খোলো,

ক্ষুধার ঠাকুর দাঁড়ায়ে দুয়ারে পূজার সময় হলো !’

স্বপন দেখিয়া আকুল পূজারী খুলিল ভজনালয়,

দেবতার বরে আজ রাজা-টাজা হয়ে যাবে নিশ্চয় !—

জীর্ণ-বস্ত্র শীর্ণ-গাত্র, ক্ষুধায় কণ্ঠ ক্ষীণ

ডাকিল পান্থ, ‘দ্বার খোলো বাবা, খাইনিকো সাত দিন !’

সহসা বন্ধ হলো মন্দির, ভুখারি ফিরিয়া চলে,

তিমির রাত্রি, পথ জুড়ে তার ক্ষুধার মানিক জ্বলে !

ভুখারি ফুকারি কয়,

ঐ মন্দির পূজারীর, হয় দেবতা, তোমার নয় !

মসজিদে কাল শিরনি আছিল, অটেল গোস্ত-রুটি

বাঁচিয়া গিয়াছে, মোল্লা সাহেব হেসে তাই কুটিকুটি !

এমন সময় এল মুসাফির গায়ে আজারির চিন,

বলে, ‘বাবা, আমি ভুখা-ফাঁকা আছি আজ নিয়ে সাত দিন !’

তেরিয়া হইয়া হাঁকিল মোল্লা—‘ভালা হলো দেখি লেঠা,

ভুখা আছো মরো গো-ভাগাড়ে গিয়ে ! নামাজ পড়িস বেটা ?’

ভুখারি কহিল, ‘না বাবা !’ মোল্লা হাঁকিল, —‘তাহলে শালা,

সোজা পথ দেখ !’ গোস্ত-রুটি নিয়া মসজিদে দিল তালা !

ভুখারি ফিরিয়া চলে,

চলিতে চলিতে বলে—

‘আশিটা বছর কেটে গেল, আমি ডাকিনি তোমায় কভু,

আমার ক্ষুধার অন্ন তা বলে বন্ধ করোনি প্রভু !

তব মসজিদ-মন্দিরে প্রভু নাই মানুষের দাবি,

মোল্লা-পুরুত লাগায়েছে তার সকল দুয়ারে চাবি !’

কোথা চেঙ্গিস, গজনি-মামুদ, কোথায় কালাপাহাড় ?
 ভেঙে ফেল্ ঐ ভজ্ঞনালয়ের যত তলা-দেওয়া-দ্বার !
 খোদার ঘরে কে কপাট লাগায়, কে দেয় সেখানে তলা ?
 সব দ্বার এর খোলা রবে, চালা হাতুড়ি-শাবল চালা !

হায় রে ভজ্ঞনালয়,
 তোমার মিনারে চড়িয়া ভণ্ড গাহে স্বার্থের জয় !

মানুষেরে ঘৃণা করি
 ও কারা কোরান, বেদ, বাইবেল চুম্বিছে মরি মরি
 ও মুখ হইতে কেতাব-গ্রন্থ নাও জোর করে কেড়ে,
 যাহারা আনিল গ্রন্থ-কেতাব সেই মানুষেরে মেরে ।
 পূজিছে গ্রন্থ ভণ্ডের দল !—যুর্থরা সব শোনো,
 মানুষে এনেছে গ্রন্থ ; —গ্রন্থ আনেনি মানুষ কোনো !
 আদম দাউদ ঈসা মুসা ইব্রাহিম মোহাম্মদ
 কৃষ্ণ বুদ্ধ নানক কবীর, —বিশ্বের সম্পদ,
 আমাদেরি ঐরা পিতা পিতামহ, এই আমাদের মাঝে
 তাঁদেরি রক্ত কম-বেশি করে প্রতি ধমনিতে রাজে ।
 আমরা তাঁদেরি সম্মান, জ্ঞাতি, তাঁদেরি মতন দেহ,
 কে জানে কখন মোরাও অমনি হয়ে যেতে পারি কেহ ।
 হেসো না বন্ধু ! আমার আমি সে কত অতল অসীম,
 আমিই কি জানি কে জানে কে আছে আমাতে মহামহিম ।
 হয়তো আমাতে আসিছে কঙ্কি, তোমাতে মেহেদি ঈসা,
 কে জানে কাহার অন্ত ও আদি, কে পায় কাহার দিশা ?
 কাহারে করিছ ঘৃণা তুমি ভাই, কাহারে মারিছ লাথি ?
 হয়তো উহারই বৃকে ভগবান জাগিছেন দিবারাতি !
 অথবা হয়তো কিছুই নহে সে, মহান উচ্চ নহে,
 আছে ক্লেদাক্ত ক্ষত-বিক্ষত পড়িয়া দুঃখ-দহে,
 তবু জগতের যত পবিত্র গ্রন্থ ভজ্ঞনালয়
 ঐ একখানি ক্ষুদ্র দেহের সম পবিত্র নয় !
 হয়তো ইহারই ঔরসে ভাই ইহারই কুটির-বাসে
 জন্মিছে কেহ—জোড়া নাই যার জগতের ইতিহাসে !
 যে বাণী আজিও শোনেনি জগৎ, যে মহাশক্তিধরে
 আজিও বিশ্ব দেখেনি, —হয়তো আসিছে সে এরই ঘরে !

ও কে ? চণ্ডাল ? চমকাও কেন ? নহে ও ঘৃণ্য জীব !
 ওই হতে পারে হরিশ্চন্দ্র, ওই শ্যামানের শিব ।

আজ্ঞ চণ্ডাল কাল হতে পারে মহাযোগী-সম্রাট,
তুমি কাল তারে অর্ঘ্য দানিবে, করিবে নন্দীপাঠ !
রাখাল বলিয়া কারে করো হেলা, ও-হেলা কাহারে বাজে !
হয়তো গোপনে ব্রজের গোপাল এসেছে রাখাল-সাজে !

চাষা বলে করো ধৃশা !

দেখো চাষা-রূপে লুকায়ে জনক বলরাম এল কি না !
যত নবি ছিল মেঘের রাখাল, তারাও ধরিল হাল,
তারাই আনিল অমর বাণী—যা আছে রবে চিরকাল ।
দ্বারে গালি খেয়ে ফিরে যায় নিতি ভিখারি ও ভিখারিনী,
তারি মাঝে কবে এল ভোলা-নাথ গিরিজায়া, তা কি চিনি !
তোমার ভোগের হ্রাস হয় পাছে ভিক্ষা-মুষ্টি দিলে,
দ্বারী দিয়ে তাই মার দিয়ে তুমি দেবতারে খেদাইলে ।

সে মার রহিল জমা—

কে জানে তোমায় লাঞ্ছিতা দেবী করিয়াছে কি না ক্ষমা !
বন্ধু, তোমার বুক-ভরা লোভ দু'চোখে স্বার্থ-ঠুলি,
নতুবা দেখিতে, তোমারে সেবিতো দেবতা হয়েছে কুলি ।
মানুষের বুক থেকে যেটুকু দেবতা, বেদনা-মথিত-সুধা,
তাই লুটে তুমি খাবে পশু ? তুমি তা দিয়ে মিটাবে ক্ষুধা ?
তোমার ক্ষুধার আহার তোমার মন্দোদরীই জানে
তোমার মৃত্যু-বাণ আছে তব প্রাসাদের কোনোখানে !

তোমারি কামনা-রানি

যুগে যুগে, পশু, ফিরেছে তোমায় মৃত্যু-বিবরে টানি ।

পাপ

সাম্যের গান গাই !—

যত পাপী-তাপী সব মোর বোন, সব হয় মোর ভাই ।
এ পাপ-মূলকে পাপ করেনিকো কে আছে পুরুষ-নারী ?
আমরা তো ছার ; —পাপে পঙ্কিল পাপীদের কাণ্ডারি !
তেত্রিশ কোটি দেবতার পাপে স্বর্গ সে টলমল,
দেবতার পাপ-পথ দিয়া পশে স্বর্গে অসুর দল !

আদম হইতে শুরু করে এই নজরুল তবু সবে
কম-বেশি করে পাপের ছুরিতে পুণ্য করেছে জবেহ।

বিশ্ব পাপস্থান

অর্ধেক এর ভগবান, আর অর্ধেক শয়তান !

ধর্মাস্করা শোনো !

অন্যের পাপ গনিবার আগে নিজেদের পাপ গোনো !

পাপের পক্ষে পুণ্য-পদ্ম, ফুলে ফুলে হেথা পাপ !

সুন্দর এই ধরা-ভরা শুধু বঞ্চনা অভিশাপ।

এদের এড়াতে না পারিয়া যত অবতার আদি কেহ

পুণ্য দিলেন আত্মা ও প্রাণ, পাপেরে দিলেন দেহ।

বন্ধু, কহিনি মিছে,

ব্রহ্মা বিষ্ণু শিব হতে ধরে ক্রমে নেমে এস নিচে—

মানুষের কথা ছেড়ে দাও, যত ধ্যানী মুনি ঋষি যোগী

আত্মা তাঁদের ত্যাগী তপস্বী, দেহ তাঁহাদের ভোগী !

এ দুনিয়া পাপশালা,

ধর্ম-গাধার পৃষ্ঠে এখানে শূন্য পুণ্য-ছালা।

হেথা সবে সম পাপী

আপন পাপের বাটখারা দিয়ে অন্যের পাপ মাপি !

জবাবদিহির কেন এত ঘটা যদি দেবতাই হও,

টুপি পরে টিকি রেখে সদা বলো যেন তুমি পাপী নও !

পাপী নও যদি কেন এ ভড়ং ট্রেডমার্কের ধুম ?

পুলিশি পোশাক পরিয়া হয়েছ পাপের আসামি গুম !

বন্ধু, একটা মজার গল্প শোনো,

একদা অপাপ ফেরেশতা সব স্বর্গ-সভায় কোনো

এই আলোচনা করিতে আছিল বিধির নিয়মে দুষ্টি—

দিন রাত নাই এত পূজা করি এত করে তাঁরে তুষ্টি

তবু তিনি যেন খুশি নন—তাঁর যত স্নেহ দয়া ঝরে

পাপ-আসক্ত কাদা ও মাটির মানুষ জাতিরই পরে !

শুনিলেন সব অন্তর্যামী, হাসিয়া সবারে কন,—

মলিন ধুলার সন্তান ওরা বড় দুর্বল মন,

ফুলে ফুল সেথা ভুলের বেদনা—নয়নে, অধরে শাপ,

চন্দনে সেথা কামনার জ্বালা, চাঁদে চুম্বন-তাপ !

সেথা কামিনীর নয়নে কাজল, শ্রেণীতে চন্দ্রহার,

চরণে লাক্ষা, ঠোটে তাম্বুল, দেখে মরে আছে মার !

প্রহরী সেখানে চোখা চোখ নিয়ে সুন্দর শয়তান,
 বুকে বুকে সেথা বাঁকা ফুল-ধনু, চোখে চোখে ফুল-বাণ।
 দেবদূত সব বলে, 'প্রভু, মোরা দেখিব কেমন ধরা,
 কেমনে সেখানে ফুল ফোটে যার শিয়রে মৃত্যু-জরা !'
 কহিলেন বিভূ—'তোমাদের মাঝে শ্রেষ্ঠ যে দুইজন
 যাক পৃথিবীতে, দেখুক কি ঘোর ধরণীর প্রলোভন !'
 'হারুত' 'মারুত' ফেরেশতাদের গৌরব রবি-শশী
 ধরার ধুলার অংশী হইল মানবের গৃহে পশি।—
 কায়ায় কায়ায় মায়া বুলে হেথা ছায়ায় ছায়ায় ফাঁদ,
 কমল-দিঘিতে সাতশো হয়েছে এক আকাশের চাঁদ !
 শব্দ গন্ধ বর্ণ হেথায় পেতেছে অরূপ-ফাঁসি,
 ঘাটে ঘাটে হেথা ঘট-ভরা হাসি, মাঠে মাঠে কাঁদে বাঁশি !
 দুদিনে আতশি ফেরেশতা-প্রাণ ভিজিল মাটির রসে,
 শফরি-চোখের চটুল চাতুরি বুকে দাগ কেটে বসে।
 ঘাঘরি বলকি গাগরি ছলকি নাগরী 'জোহরা' যায়—
 স্বর্গের দূত মজিল সে রূপে বিকাইল রাজ্য পায় !
 অধর-আনার-রসে ডুবে গেল দোজখের নার-ভীতি
 মাটির সোরাহি মস্তানা হলো আগুরি খুনে তিতি !
 কোথা ভেসে গেল সংঘম-বাঁধ, বারণের বেড়া টুটে,
 প্রাণ ভরে পিয়ে মাটির মদিরা ওষ্ঠ-পুষ্প-পুটে।
 বেহেশতে সব ফেরেশতাদের বিধাতা কহেন হাসি—
 'হারুত মারুতে কি করেছে দেখো ধরণী সর্বনাশী !'
 নয়না এখানে জাদু জানে সখা এক আঁধি-ইশারায়
 লক্ষ যুগের মহা তপস্যা কোথায় উবিয়া যায়।
 সুন্দর বসুমতী
 চিরযৌবনা, দেবতা ইহার শিব নয়—কাম রতি !

চোর-ডাকাত

কে তোমায় বলে ডাকাত বন্ধু, কে তোমায় চোর বলে ?
 চারিদিকে বাজ ডাকাতি উচ্চ, চোরেরি রাজ্য চলে !

চোর-ডাকাতের করিছে বিচার কোন সে ধর্মরাজ ?
 জিজ্ঞাসা করো, বিশ্ব জুড়িয়া কে নহে দস্যু আজ ?
 বিচারক ! তব ধর্মদণ্ড ধরো,
 ছোটদের সব চুরি করে আজ বড়রা হয়েছে বড় !
 যারা যত বড় ডাকাত-দস্যু জোচ্চোর দাগবাজ
 তারা তত বড় সম্মানী গুণী জাতি-সম্মেতে আজ ।
 রাজার প্রাসাদ উঠিছে প্রজার জমাট রক্ত-ইটে,
 ডাকু ধনিকের কারখানা চলে নাশ করি কোটি ভিটে ।
 দিব্যি পেতেছ খল কলওলা মানুষ-পেষানো কল,
 আখ-পেষা হয়ে বাহির হতেছে ভুখারি মানব-দল !
 কোটি মানুষের মনুষ্যত্ব নিঙাড়িয়া কলওয়লা
 ভরিছে তাহার মদিরা-পাত্র, পুরিছে স্বর্ণ-জালা !
 বিপন্নদের অন্ন ঠাসিয়া ফেলে মহাজন-ভুঁড়ি
 নিরন্নদের ভিটে নাশ করে জমিদার চড়ে জুড়ি !
 পেতেছে বিশ্বে বণিক-বৈশ্য অর্থ-বেশ্যালয়,
 নিচে সেথা পাপ-শয়তান-সাকি, গাহে যক্ষের জয় !
 অন্ন, স্বাস্থ্য, প্রাণ, আশা, ভাষা হারায়ে সকল-কিছু
 দেউলিয়া হয়ে চলেছে মানব ধ্বংসের পিছু পিছু ।

পালাবার পথ নাই,

দিকে দিকে আজ অর্থ-পিশাচ খুঁড়িয়াছে গড়খাই ।
 জগৎ হয়েছে জিন্দানখানা, প্রহরী যত ডাকাত—
 চোরে-চোরে এরা মাসতুতো ভাই, ঠগে ও ঠগে স্যাঙাৎ ।
 কে বলে তোমায় ডাকাত, রন্ধু, কে বলে করিছ চুরি ?
 চুরি করিয়াছ টাকা ঘটি বাটি, হৃদয়ে হানোনি ছুরি !
 ইহাদের মতো অমানুষ নহ, হতে পারো তক্ষর,
 মানুষ দেখিলে বাল্লীকি হও তোমরা রত্নাকর !

বারাঙ্গনা

কে তোমায় বলে বারাঙ্গনা মা, কে দেয় থুতু ও-গায়ে ?
 হয়তো তোমায় স্তন্য দিয়াছে সীতা-সম সতী মায়ে ।

নাই হলে সতী তবু তো তোমরা মাতা-ভগিনীরই জাতি ;
তোমাদের ছেলে আমাদেরই মতো, তারা আমাদের স্ত্রীতি ;
আমাদেরই মতো খ্যাতি-যশ-মান তারাও লভিতে পারে,
তাদেরও সাধনা হানা দিতে পারে সদর স্বর্গ-দ্বারে ।—

স্বর্গবেশ্যা ঘৃতাচী-পুত্র হলো মহাবীর দ্রোণ
কুমারীর ছেলে বিশ্ব-পূজ্য কৃষ্ণ-দ্বৈপায়ন,
কানীন-পুত্র কর্ণ হইল দানবীর মহারথী,
স্বর্গ হইতে পতিতা গঙ্গা শিবেরে পেলেন পতি,
শান্তনু রাজা নিবেদিল প্রেম পুন সেই গঙ্গায়—
তাঁদেরি পুত্র অমর ভীষ্ম, কৃষ্ণ প্রণমে যাঁয় !
মুনি হলো শুনি সত্যকাম সে জারজ জবালা-শিশু,
বিস্ময়কর জন্ম যাঁহার—মহাপ্রেমিক সে যিশু !—
কেহ নহে হেথা পাপ-পঙ্কিল, কেহ সে ঘৃণ্য নহে,
ফুটিছে অযুত বিমল কমল কামনা-কালিয়-দহে ।

শোনো মানুষের বাণী,

জনমের পর মানব জাতির থাকে নাকো কোনো গ্লানি !
পাপ করিয়াছ বলিয়া কি নাই পুণ্যেরও অধিকার ?
শত পাপ করি হয়নি ক্ষুণ্ণ দেবত্ব দেবতার ।
অহল্যা যদি মুক্তি লভে মা, মৈরী হতে পারে দেবী,
তোমরাও কেন হবে না পূজ্য বিমল সত্য সেবি ?
তব সন্তানে জারজ বলিয়া কোন গোঁড়া পাড়ে গালি ?
তাহাদেরে আমি এই দুটো কথা জিজ্ঞাসা করি খালি—

দেবতা গো জিজ্ঞাসি—

দেড়শত কোটি সন্তান এই বিশ্বের অধিবাসী—
কয়জন পিতামাতা ইহাদের হয়ে নিষ্কাম ব্রতী
পুত্রকন্যা কামনা করিল ? কয়জন সৎ-সতী ?
ক'জন করিল তপস্যা ভাই সন্তান-লাভ তরে ?
কার পাপে কোটি দুখের বাচ্চা আঁতুড়ে জন্ম মরে ?
সেরেফ পশুর ক্ষুধা নিয়া হেথা মিলে নরনারী যত,
সেই কামনার সন্তান মোরা ! তবুও গর্ব কত !

শোনো ধর্মের চাঁই—

জারজ কামজ সন্তানে দেখি কোনো সে প্রভেদ নাই !

অসতী মাতার পুত্র সে যদি জারজ-পুত্র হয়,
অসৎ পিতার সন্তানও তবে জারজ সুনিশ্চয় !

মিথ্যাবাদী

মিথ্যা বলেছ বলিয়া তোমায় কে দিল মনস্তাপ ?
সত্যের তরে মিথ্যা যে বলে স্পর্শে না তারে পাপ ।
গোটা সত্যটা শুধু তো সত্য কথা বলাতেই নাই,
মিথ্যা কয়েও সত্যনিষ্ঠ হতে পারি আমরাই !
সত্যবাক সে বড় কিছু নয়, ক'জন সত্যবান ?
সত্যবাদীরা ক'জন দিয়াছে সত্যের তরে প্রাণ ?
অন্তরে যারা যত বেশি ভীকু যত বেশি দুর্বল,
নীতিবিদ, তারা তত বেশি করে সত্য-কখন ছিল ।
সত্যকামেরও নমস্য যারা সত্যনিষ্ঠ বীর—
সত্যের তরে হাসিতে হাসিতে যারা দিল নিজ শির !
হয়তো তাহারা অনেক মিথ্যা বলেছে জীবন ভরে,
তবু তারা বীর—তারা দিল প্রাণ সত্য-রক্ষা তরে ।
সত্য লইয়া করিছে ওজন কে উনি মুদির মতো ?
মনে মনে ভাবে কি কাজই করিনু আমি সে বিজ্ঞ কত !
বলি ওহে বাপু সত্য-ব্যাপারি, সত্য কি চাল ডাল ?
কোথা কয় রতি সত্য কমিল, তাই নিয়ে দেবে গাল !

সত্য মুদির তথ্য :—

অমুক বীরের জীবনে কমেছে হুঁ হুঁ এতটুকু সত্য !
ও কে আসে বাবা ? সত্যেরে তবু এরা মাপে, ও যে গণে ।
দশটি কথায় বাঁধিল সত্য, হেসে মরি মনে মনে !
বাটখারা আর রশি নিয়ে এল সত্যের পিসি-মাসি,
মাপিয়া মাপিয়া ভরিল বস্তা, গুনে গুনে বাঁধে খাসি ।
বন্ধু, শুনো না কুট-তর্কের যত হাতি ঘোড়া উট,
সত্যনিষ্ঠা থাকে যদি প্রাণে, বেপরোয়া বলো কুট !

নারী

সাম্যের গান গাই—

আমার চক্ষে পুরুষ-রমণী কোনো ভেদাভেদ নাই।
বিশ্বে যা-কিছু মহান সৃষ্টি চির-কল্যাণকর
অর্ধেক তার করিয়াছে নারী, অর্ধেক তার নর।
বিশ্বে যা-কিছু এল পাপ-তাপ বেদনা অশ্রুবারি
অর্ধেক তার আনিয়াছে নর, অর্ধেক তার নারী।
নরককুণ্ড বলিয়া কে তোমা করে নারী হয়-জ্ঞান ?
তারে বলো, আদি-পাপ নারী নহে, সে যে নর-শয়তান।
অথবা পাপ যে-শয়তান যে-নর নহে নারী নহে,
ক্লীব সে, তাই সে নর ও নারীতে সমান মিশিয়া রাহে।
এ-বিশ্বে যত ফুটিয়াছে ফুল, ফলিয়াছে যত ফল,
নারী দিল তাহে রূপ-রস-মধু-গন্ধ সুনির্মল।
তাজমহলের পাথর দেখেছ, দেখিয়াছ তার প্রাণ ?
অস্তুরে তার মোমতাজ নারী, বাহিরেতে শা-জাহান।
জ্ঞানের লক্ষ্মী, গানের লক্ষ্মী, শস্য-লক্ষ্মী নারী,
সুখমা-লক্ষ্মী নারীই ফিরিছে রূপে রূপে সঞ্চারি।
পুরুষ এনেছে দিবসের জ্বালা তপ্ত রৌদ্রদাহ,
কামিনী এনেছে যামিনী-শান্তি, সমীরণ, বারিবাহ।
দিবসে দিয়াছে শক্তি-সাহস, নিশীথে হয়েছে বধু,
পুরুষ এসেছে মরুতৃষা লয়ে, নারী জোগায়েছে মধু।
শস্যক্ষেত্র উর্বর হলো, পুরুষ চালাল হল,
নারী সেই মাঠে শস্য রোপিয়া করিল সুশ্যামল।
নর বাহে হল, নারী বহে জল, সেই জল-মাটি মিশে
ফসল হইয়া ফলিয়া উঠিল সোনালি ধানের শীষে।

স্বর্ণ-রৌপ্যভার

নারীর অঙ্গ-পরশ লভিয়া হয়েছে অলঙ্কার।
নারীর বিরহে, নারীর মিলনে, নর পেল কবি-প্রাণ,
যত কথা তার হইল কবিতা, শব্দ হইল গান।

নর দিল ক্ষুধা, নারী দিল সুধা, সুধায় ক্ষুধায় মিলে
 জন্ম লভিছে মহামানবের মহাশিশু তিলে তিলে।
 জগতের যত বড় বড় জয় বড় বড় অভিযান
 মাতা ভগ্নী ও বধূদের ত্যাগে হইয়াছে মহীয়ান।
 কোন রণে কত খুন দিল নর, লেখা আছে ইতিহাসে,
 কত নারী দিল সিঁথির সিঁদুর, লেখা নাই তার পাশে।
 কত মাতা দিল হৃদয় উপাড়ি কত বোন দিল সেবা,
 বীরের স্মৃতি-স্তুম্ভের গায়ে লিখিয়া রেখেছে কেবা ?
 কোনো কালে একা হয়নিকো জয়ী পুরুষের তরবারি,
 প্রেরণা দিয়াছে, শক্তি দিয়াছে বিজয়-লক্ষ্মী নারী।
 রাজা করিতেছে রাজ্য-শাসন, রাজারে শাসিছে রানি,
 রানির দরদে ধুইয়া গিয়াছে রাজ্যের যত গ্লানি।

পুরুষ হৃদয়হীন,

মানুষ করিতে নারী দিল তারে আধেক হৃদয় ঋণ।
 ধরায় যাঁদের যশ ধরে নাকো অমর মহামানব,
 বরষে বরষে যাঁদের সুরণে করি মোরা উৎসব,
 খেয়ালের বশে তাঁদের জন্ম দিয়াছে বিলাসী পিতা।
 লব-কুশে বনে ত্যাজিয়াছে রাম, পালন করেছে সীতা !
 নারী সে শিখাল শিশু-পুরুষেরে স্নেহ প্রেম দয়া মায়া,
 দীপ্ত নয়নে পরাল কাজল বেদনার ঘন ছায়া।
 অদ্ভুতরূপে পুরুষ পুরুষ করিল সে ঋণ শোধ,
 বুকে করে তারে চুমিল যে, তারে করিল সে অবরোধ !

তিনি নর-অবতার—

পিতার আদেশে জননীরে যিনি কাটেন হানি কুঠার !
 পার্শ্ব ফিরিয়া শুয়েছেন আজ অর্ধনারীশ্বর—
 নারী চাপা ছিল এতদিন, আজ চাপা পড়িয়াছে নর !
 সে-যুগ হয়েছে বাসি,
 যে যুগে পুরুষ দাস ছিল নাকো, নারীরা আছিল দাসী !
 বেদনার যুগ, মানুষের যুগ, সাম্যের যুগ আজি,
 কেহ রহিবে না বন্দি কাহারও, উঠিছে ডঙ্কা বাজি।
 নর যদি রাখে নারীকে বন্দি, তবে এর পর যুগে
 আপনাবি রচা ঐ কাবাগারে পুরুষ মরিবে ভুগে !

যুগের ধর্ম এই—

পীড়ন করিলে সে-পীড়ন এসে পীড়া দেবে তোমাকেই !
 শোনো মর্জের জীব !
 অন্যে যত করিবে পীড়ন, নিজে হবে তত ক্লীব !

স্বর্ণ-রৌপ্য অলঙ্কারের যক্ষপূরীতে নারী
করিল তোমায় বন্দিনী, বেলো, কোন সে অত্যাচারী ?
আপনারে আজ প্রকাশের তব নাই সেই ব্যাকুলতা,
আজ তুমি ভিন্ন আড়ালে থাকিয়া নেপথ্যে কও কথা !
চোখে চোখে আজ চাহিতে পারো না ; হাতে রুলি, পায়ে মল
মাথায় ঘোমটা, ছিড়ে ফেলো নারী, ভেঙে ফেলো ও-শিকল !
যে-ঘোমটা তোমা করিয়াছে ভিন্ন ওড়াও সে আবরণ !
দূর করে দাও দাসীর চিহ্ন ঐ যত আভরণ !

ধরার দুলালি মেয়ে !

ফিরো না তো গিরি-দরী-বনে শাখী-সনে গান গেয়ে ।
কখন আসিল 'পুটো' যমরাজা নিশীথ-পাখায় উড়ে,
ধরিয়া তোমায় পুরিল তাহার আঁধার বিবর-পুরে ।
সেই সে আদিম বন্ধন তব, সেই হতে আছো মরি
মরণের পুরে ; নামিল ধরায় সেই দিন বিভাবরী ।
ভেঙে যমপূরী নাগিনীর মতো আয় মা পাতাল ফুঁড়ি !
আঁধারে তোমায় পথ দেখাবে মা তোমারি ভগ্ন চুড়ি !
পুরুষ যমের ক্ষুধার কুকুর মুক্ত ও পদাঘাতে
লুটায় পড়বে ও চরণ-তলে দলিত যমের সাথে !
এতদিন শুধু বিলালে অমৃত, আজ প্রয়োজন যবে
যে হাতে পিয়ালে অমৃত, সে হাতে কট বিষ দিতে হবে ।

সেদিন সুদূর নয়—

যেদিন ধরণী পুরুষের সাথে গাহিবে নারীরও জয় !

রাজা-প্রজা

সাম্যের গান গাই

যেখানে আসিয়া সম-বেদনায় সকলে হয়েছি ভাই ।

এ প্রশ্ন অতি সোজা,

এক ধরণীর সন্তান, কেন কেউ রাজা, কেউ প্রজা ?

অদ্ভুত দর্শন—

এই সোজা কথা বলি যদি ভাই, হবে তাহা সিডিশন ।

প্রজা হয় শুধু রাজ-বিদ্রোহী, কিন্তু কাহারে কহি,
 অন্যায় করে কেন হয় নাকো রাজাও প্রজাদ্রোহী !
 প্রজারা সৃজন করেছে রাজায়, রাজা তো সৃজেনি প্রজা,
 কৃতজ্ঞ রাজা তাই কি প্রজায় ধরে করে দিল খোজা ?
 বন্ধু হাসিছ চুটে,
 আপনার ঘরে হয়ে আছি সব গোলাম নফর মুটে !

আপনার পুরুষত্ব অন্যে ঈপিয়া কি পেনু দাম ?
 আগলাতে রাজা-রাজ্য-হেরেম হয়েছি খোজা গোলাম !
 এ ব্যথা কাহারে কই,

যার ঘর তার ঘর নয় আর নেপো মারে এসে দই !
 যাদের লইয়া রাজ্য, রাজ্যে নাই তাহাদেরই দাবি,
 রাজা-দেবতার অনন্ত ভোগ, আমরা খেতেছি খাবি !
 এ নিয়ে নালিশ কার কাছে করি, জয় রাজাজি কি জয় !
 আমাদের হয় সুবিচার, নাই রাজারই বিচারালয় !
 গুরু গুরু বাজে যুদ্ধ-ডকা, দলে দলে ছুটে ছেলে,
 হেসে বুক চিরে কলসি কলসি তাজা খুন দিল ঢেলে ।
 কলিজা-ছিদ্রে দীর্ঘশ্বাস ফুঁ দিয়া বাজায় শাঁখ,
 ঘরে ঘরে ওঠে ত্রন্দন-উলু, চালে চালে ওড়ে কাক ;
 প্রস্তুত হলো পথ—

বাজা, শাঁখ বাজা, ওই দেখা যায় জয়-লক্ষ্মীর রথ !
 মাগো কাঁদ তোরা, আদুরি বোনেরা ধুলায় লুটায় পড়,
 সিথায় সিঁদুর নাই দিলি বধু, চল্ খেমে গেছে ঝড় ।
 ফেরেনি ছেলেরা, ফেরেনি ভাইরা ? ফেরেনিকো পতি ? ওরে,
 দুঃখ কি ? ওরা স্থান পেয়েছে যে জয়-লক্ষ্মীর ক্রোড়ে !

আজিকে রাজ্যময়

শোকের তুফান ছাপাইয়া ওঠে—জয় রাজাজি কি জয় !
 বাজা রে ডকা বাজা !

এতদিন পরে কেহ্না ছাড়িয়া বাহির হয়েছে রাজা !
 নিহত আহত বীরেরে মাড়ায়ে ছুটেছে রাজার রথ,
 যুদ্ধ-ফেরত খঞ্জ পসু পালা পালা ছাড়ো পথ !

বন্ধু, এমনি হয়—

জনগণ হলো যুদ্ধে বিজয়ী, রাজার গাহিল জয় ।

প্রজারা জোগায় খোরাক-পোশাক, কি বিচার বলিহারি,
প্রজার কর্মচারী নন তাঁরা রাজার কর্মচারী !
মোদেরি বেতন-ভোগী চাকরিরে সালাম করিব মোরা,
ওরে 'পাবলিক সার্ভেন্ট'দেরে আয় দেখে যাবি তোরা !

কালের চরকা ঘোর,

দেড়শত কোটি মানুষের ঘাড়ে—চড়ে দেড়শত চোর ।
এ আশা মোদের দুবাশাও নয়, সেদিন সুদূরও নয়—
সমবেত রাজ-কণ্ঠে যেদিন শুনিব প্রজার জয় !

সাম্য

গাহি সাম্যের গান—

বুকে বুকে হেথা তাজা সুখ ফোটে, মুখে মুখে তাজা প্রাণ !
বন্ধু, এখানে রাজা-প্রজা নাই, নাই দরিদ্র-ধনী,
হেথা পায় নাকো কেহ ক্ষুদ্র-ঘাঁটা, কেহ দুধ-সর-ননী ।
অশ্ব-চরণে মোটর-চাকায় প্রণমে না হেথা কেহ,
ঘৃণা জাগে নাকো সাদাদের মনে দেখে হেথা কালা-দেহ ।

সাম্যবাদী-স্থান—

নাইকো এখানে কালা ও ধলার আলাদা গোরস্থান ।
নাইকো এখানে কালা ও ধলার আলাদা গির্জা-ঘর,
নাইকো পাইক-বরকন্দাজ নাই পুলিশের ডর ।
এই সে স্বর্গ, এই সে বেহেশত, এখানে বিভেদ নাই,
যত হাতাহাতি হাতে হাত রেখে মিলিয়াছে ভাই ভাই !
নাইকো এখানে ধর্মের ভেদ শাস্ত্রের কোলাহল,
পাদরি-পুরুত-মোল্লা-ভিক্ষু এক গ্লাসে খায় জল ।
হেথা স্রষ্টার ভজনা-আলয় এই দেহ এই মন,
হেথা মানুষের বেদনায় তাঁর দুখের সিংহাসন !
সাড়া দেন তিনি এখানে তাঁহারে যে নামে যে কেহ ডাকে,
যেমন ডাকিয়া সাড়া পায় শিশু যে নামে ডাকে সে মাকে !
পায়জামা প্যান্ট ধুতি নিয়া হেথা হয় নাকো ঘুষাঘুষি,
ধুলায় মলিন দুখের পোশাকে এখানে সকলে খুশি ।

কুলি-মজুর

দেখিনু সেদিন রеле,
কুলি বলে এক বাবু সাব্ব তারে ঠেলে দিল নিচে ফেলে !
চোখ ফেটে এল জল,
এমনি করে কি জগৎ জুড়িয়া মার খাবে দুর্বল ?
যে দধীচিদের হাড় দিয়ে ঐ বাষ্প-শকট চলে,
বাবু সাব্ব এসে চড়িল তাহাতে, কুলিরা পড়িল তলে ।
বেতন দিয়াছ ?—চুপ রও যত মিথ্যাবাদীর দল !
কত পাই দিয়ে কুলিদের তুই কত ক্রোর পেলি বল !
রাজপথে তব চলিছে মোটর, সাগরে জাহাজ চলে,
রেলপথে চলে বাষ্প-শকট, দেশ ছেয়ে গেল কলে,
বলো তো এ-সব কাহাদের দান ! তোমার অট্টালিকা
কার খুনে রাঙা ?—ঠুলি খুলে দেখো, প্রতি ইটে আছে লিখা ।
তুমি জানো নাকো, কিন্তু পথের প্রতি ধূলিকণা জানে
ঐ পথ, ঐ জাহাজ, শকট, অট্টালিকার মানে !

আসিতেছে শুভদিন,
দিনে দিনে বহু বাড়িয়াছে দেনা, শুধিতে হইবে ঋণ !
হাতুড়ি শাবল গাঁইতি চালায়ে ভাঙিল যারা পাহাড়,
পাহাড়-কাটা সে পথের দু'পাশে পড়িয়া যাদের হাড়,
তোমারে সেবিত্তে হইল যাহারা মজুর, মুটে ও কুলি,
তোমারে বহিত্তে যারা পবিত্র অঙ্গে লাগাল ধূলি ;
তারাই মানুষ, তারাই দেবতা, গাহি তাহাদেরি পান,
তাদেরি ব্যথিত বক্ষে পা ফেলে আসে নব উত্থান !
তুমি শুয়ে রবে তেতালার পুরে, আমরা রহিব নিচে,
অখচ তোমারে দেবতা বলিব, সে-ভরসা আছ মিছে !
সিন্ধু যাদের সারা দেহ-মন মাটির মমতা-রসে
এই ধরণীর তরণীর হাল রবে তাহাদেরি বশে !
তারি পদরজ্ঞ অঞ্জলি করি মাথায় লইব তুলি,
সকলের সাথে সাথে চলি যার পায়ে লাগিয়াছে ধূলি !

আজ নিখিলের বেদনা—আর্ত পীড়িতের মাখি খুন,
 লালে লাল হয়ে উদ্বিগ্নে নবীন প্রভাতের নবাকরণ !
 আজ হৃদয়ের জাম-ধরা যত কবাট ভাঙিয়া দাও,
 রঙ-করা ঐ চামড়ার যত আবরণ খুলে নাও !
 আকাশের আজ যত বায়ু আছে হইয়া জমাট নীল,
 মাতামাতি করে ঢুকুক এ বৃকে, খুলে দাও যত খিল !
 সকল আকাশ ভাঙিয়া পড়ুক আমাদের এই ঘরে
 মোদের মাথায় চন্দ্র-সূর্য তারারা পড়ুক করে !
 সকল কালের সকল দেশের সকল মানুষ আসি
 এক মোহানায় দাঁড়াইয়া শোনো এক মিলনের বাঁশি ।
 একজনে দিলে ব্যথা
 সমান হইয়া বাজে সে বেদনা সকলের বৃকে হেথা ।
 একের অসম্মান
 নিখিল মানব-জাতির লজ্জা—সকলের অপমান !

মহা-মানবের মহা-বেদনার আজি মহা-উত্থান,
 উর্ধ্বে হাসিছে ভগবান, নিচে কাঁপিতেছে শয়তান !